



26. august 2014

UKA 2014/63

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aningaasarsianit akileraarutit pillugit Inatsisartut inatsisaat nr. 9, 3. december 2012 atuutinneqalersoq taamaatikku mallugu peqqussutillu tamatuma siorna atuuttut atuutilleqqeqqullugit Aningaasarsianit akileraarutit pillugit Inatsisartut Inatsisaanni § 22, § 23-lu allanngortinnissaannut siunnersuummik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Tunngavilersuut

Akileraartarnermut Atungarissaarnermullu ataatsimiititaliaq, Aningaasaqarnermut Siunnersuisoqatigiit allallu isumaqatigiillutik tikkuarpaat sulliviit namminersortut ineriartortinneqartariaqartut. Demokraatini tamanna isumaqatigilluinnarparput. Pisariaqarpoq nunatsinni namminersortuuneq inerisarneqartariaqartoq, namminersortuunermillu oqaratta isumaqarpoq namminersortuviit. Namminersortunngorsaanerunngilaq pisortat suliffeqarfiutaanik ingerlatseqatigiiffingortitsisarneq.

Taamaattumik pingaaruteqarluinnarpoq sulliviit namminersortut aningaasarsiorlualerpat pitsaasunik atugaqarnissaat malitassaqaarnissaallu. Sullivik namminersortuq aningaasarsiorlualerpat periarfissaqaarnerulissaaq sinneqartoortut atorlugit sullivimmuut aningaasaliinissaaq, sullivik angineruleqqullugu taamaasillunilu sullivinnik amerlanerusunik nutaanik pilersitsilluni inuiaqatigiit iluaqutissaannik.

2012-mi Naalackersuisuusut nunatsinni sulliviit nalikilliliisinnaanerat ajorseriartippaat. Taamani suliffiutillit, Kalaallit Nunaanni Sulisitsisut Peqatigiiffiat, KPMG Grønland allallu oqarput, nalikilliliisinnaanermut periarfissat ajorseriarnerat ernumanartortaartoq. Demokraatini aamma ernumanerput oqaatigaarput, taamaakkaluartorli nalikilliliinermut periarfissat ajorseriniarnissaannut akuerseqataavugut, isumaqatigiissut annertujaq aningaasalersorneqartussaammat akileraarutit procentimik ataatsimik appartinnerisigut.

Demokraatini peqqinnartuuvoq tunngavigalugu kukkusimangaanni nassuerutiginninnissaaq. Kukkuneruvoq namminersortulutik suliffiutillit nalikilliliinissamut periarfissaannik ajorseriartitsineq. Kukkuneq ajusaarutigaarput taamaattumik una siunnersuut aqutugalugu allanngortikkusupparput.

2012-mi naatsorsuinerit uppernarpatata nalikilliliinermut malittarisassaasimasut eqquteqqinneri pisortanut 21 millioner koruuninik naleqassapput. Naalackersuisut qinnuigaagut akissumminni ilanngutissagaat, decembarimi 2012-mi nalikilliliinermut malittarisassat allanngortinneqarmatali pisortat qanoq iluanaaruteqarsimanersut.



Demokraatini qularinngilarput siunnersuutip kinguneranik sulliviit ingerlatseqatigiiffiillu nalikilliliinerusinnaanngornerat inuiaqatigiinnut iluaqusiiumaartoq, sulliviit amerlanerulersussaammata taamatullu inuinnaat sulliviillu akileraarutaasigut isertitat amerlanerulerlutik. Aappaatut Demokraatini siunnersuutigaarput siunnersuut akileersorneqassasoq suliffissaaleqinerup akiornissaanut aningaasaliissutaasimasut ilaannit, isumaqaratta sullivinnut namminersortunut iluaqusiinerup kingunerissagaa sulliviit amerlanerit pilersinneqarnerat.

Pisortanut aningaasarsiornikkut allaffissornikkullu kingunissai

Nalikilliliinermut malittarisassat 2012-mi allanngortinneqarmata naatsorsuutigineqarsimagaluarpoq pisortat (Namminersorlutik Oqartussat aamma kommunit) ukiumut 21 millioner koruuninik pissarsinerusalernaartut. Tamanna pisimansoq nalunarput, naatsorsuutigineqartulli ilumoorpata pisortat 21 millioner koruuninik annaasaqartarsimassapput. Ilanngunneqartariaqarporli allannguisoqarpat sullivinni namminersortuni suliffiit amerlanerit pilersinneqassammata kingunerissallugu akileraarutitigut isertitat amerlanerulerneru kiisalu inunnik isumaginninnermut aningaasartuutikinnerulerneq.

Namminersortunut aningaasarsiornikkut allaffissornikkullu kingunissai

Namminersorlutik suliffiutillit aningaasatigut iluaquserneqassapput, nalikilliliinissamut malittarisassat iluaqusiinerusalertussaammata.

Innuttaasunut aningaasarsiornikkut allaffissornikkullu kingunissai.

Soqanngilaq.